

docriver 文川网
古籍书城
入驻商家
获取更多电子书

中國方志叢書·華南地方·第二四九號

據

清·光緒二十八年刊本
薛福成輯

影印

雲南省

滇緬劃界圖說



5016975

成文出版社有限公司印行



10101835

中華民國六十三年六月壹一版

滇緬劃界圖說

全冊

發行人：**黃成助**

台北市郵政信箱二二六〇五號

出版者：**成文出版社有限公司**

台北市郵政信箱二二六〇五號

台北市濟南路三段二十七號之二

電話：七八七〇二五

印刷者：**成文出版社有限公司**

內政部登記證內版台業字第一一四七號


滇緬劃界圖說

李廣平署

docsriver 文川网
入驻商家 古籍书城

在文川网搜索古籍书城 获取更多电子书

光緒壬寅季冬
無錫傳經樓印



滇緬劃界圖說

無錫薛福成叔耘

奏疏

滇緬分界通商事宜疏

光緒十七年正月二十五日

奏爲滇緬分界通商亟應豫爲籌備不使英國獨占先著以免臨時棘手恭摺
密陳仰祈

聖鑒事竊查倫敦使署接管卷內光緒十一年冬間英國印度派兵出境進據緬甸維時出使大臣曾紀澤承准總理各國事務衙門密電疊次與英外部會商初議立君存祀俾守十年一貢之例既不可得始議定由英駐緬大員按期遣使賫獻儀物其界務商務兩事則擬先定分界再籌通商蓋因英人注意商務若分劃邊界偶有轆轤則辦理通商諸多掣肘虧損無窮固不能不審其次第也英人自以驟關緬甸全境所獲已多是以有稍讓中國展拓邊界之說當時英外部侍郎克蕾曾稱英廷願將潞江以東之地自雲南南界之外起南抵暹羅北界西濱潞江即洋圖所謂薩爾溫江東抵瀾滄江下游其中北有南掌

國南有暹人各種。或留爲屬國。或收爲屬地。悉聽中國之便。曾紀澤轉咨總理衙門亦云。南掌本係入貢中華之國。倘英人果將潞江以東讓。我似宜受之。將暹人南掌均留爲屬國。責其按期朝貢。並將上邦之權。明告天下。方可防後患。而固邊圉等語。曾紀澤又嘗向英外部理論。欲索八募之地。八募蓋卽蠻暮之新街。昔時蠻暮土司之地。頗大。後乃悉爲緬甸所併。其商貨匯集之區。謂之新街。洋圖譯音則爲八募。距騰越邊外百數十里。在厄勒瓦諦江卽大金沙江上游之東。龍川江下游之北。檳榔江下游之南。向爲滇緬通商巨鎮。英人以其爲全緬菁華所萃。靳而未許。迨爭論數次。克蕾始云。英廷已飭駐緬之英官勘驗一地。以便允中國立埠。且可在彼設關收稅。據參贊官馬格理云。八募雖不可得其東二三十里有舊八募城。似肯讓與中國。日後貿易亦可臻繁盛。且允將大金沙江爲兩國公共之江。如此則形勢與彼同之。利益亦與彼分之。其隱裨大局。似尤較得潞東之地爲勝。曾紀澤以商辦已有端緒。因與外部互書節略存卷。暫停不議。旋卽交卸回華。光緒十二年六月。總理衙門與英使歐格訥議約五條。第一條申明十年呈進方物之例。第三條中緬邊界應由中英兩國派

員會同勘定其邊界通商事宜亦應另立專章等因在案臣竊繹總理衙門與英使訂定之約章及曾紀澤與外部會商之節略雖措辭詳略不同而大意仍相吻合蓋外部所稱願讓之地因立約時尙未勘定故以兩國派員會勘一句括之此從前商辦緬甸事務之大略情形也溯自立約至今已越五年英人未嘗催問我

國家亦暫置不理然臣近聞英廷正與暹羅勘辦界務又屢次密派幹員馳往滇緬交界查看形勢探詢礦產並有創築鐵路通接滇邊之意議者咸知彼俟布置妥協必轉以延擱已久爲辭來相促迫勢不能不驟允開辦則彼從容而我倉猝彼諳練而我生疏彼措注已周而我進退失據臨時竭蹶成算未操斷無不受虧損之理就今日情勢而論商務須從界務生根但使分界能協機宜則他日通商亦可少滋流弊夫審度利病隨宜操縱固屬總理衙門與勘界大臣之事然使明知彼族之有隱謀而緘默不言坐失事機則咎在使臣若欲先事豫籌查探邊情又非責之疆吏不可惟是分界固非詳查密訪不能得其要領而其輕重緩急之大勢則有可計議者大抵英人所稱願讓潞東之地南北

將及千里東西亦五六百里果能將南掌與撣人收爲屬國或列爲甌脫之地誠係綏邊保小之良圖惟查南掌卽老撾之轉音臣閱外洋最新圖說似老撾已歸屬暹羅若徒受英人之虛惠而終不能有其地恐轉爲外人所竊笑倘因此別生枝節又非計之得者蓋南掌撣人本各判爲數小國分附緬甸暹羅似宜查明南掌入暹羅之外是否尙有自立之國以定受與不受其向附緬甸之撣人地實大於南掌稍能自立且素服中國之化若收爲我屬則普洱順甯等府邊徼皆可鞏固矣至曾紀澤所索八募之地雖爲英人所不肯舍其曾經默許之舊八募者亦可爲通至大金沙江張本若將來竟不與爭或爭而不得臣竊有五慮焉夫天下事不進則退從前展拓邊界之論非謂區區邊界足增中國之大也臣聞乾隆年間緬甸恃強不靖吞滅滇邊諸土司騰越八關之外形勢不全西南一隅本多不甚清晰之界若我不求展出彼或反將勘入一慮也我不於邊外稍留餘地彼必築鐵路直接滇邊一遇有事動受要挾二慮也長江上源爲小金沙江最上之源由藏入滇距邊甚近洋圖卽謂之揚子江我若進分大金沙江之利尙可使彼離邊稍遠萬一仍守故界則彼窺知江源伊邇

或寔圖行船徑入長江以爭通商之利三慮也。我稍展界則通商在緬境。夫英人經營商埠最爲長技。而我在彼設關收稅亦可與之俱旺。我不展界則通商在滇境。將來彼且來擇租界設領事地方諸務究不能不受牽制。四慮也。我得大金沙江之利則迤西一路之銅可由輪船遵海北上。運費當省倍蓰。否則彼獨據運貨之利。既入滇境窺知礦產之富。或且漸生狡謀。五慮也。凡此五慮皆在意計之中。臣又竊慮英人於此數年內壹意延宕。待我相忘稍久。乃催勘界。或更遇事要求。悉置前議節略於不顧。且謀國之道莫患乎爲敵所逆料。中國素有不勤遠略之名。外洋各國知之稔矣。所以伺機而動迭起相乘。琉球滅而越南隨之。越南削而緬甸又隨之。今且駸駸議及朝鮮矣。竊思英廷前議節略。彼料中國未必竟受。而故以此相嘗試。固未可知。我若出其不意。據其前說。力與相持。或能因此稍展界務。各國知中國辦理此等事件。與前不同。亦可伐敵謀而收後效。况彼所予卽有不宜收者。不妨明指之。以爲另索之符。彼之意卽有萬難允者。不妨故求之。以得抵制之益。蓋邊情不可不洞悉。而舊議不可不重理。擬請

敕下雲貴督臣王文韶。遴派委員分途偵察。如南掌之存亡。揮人之強弱。踰越關外之地勢。民風。一一查詢。明確。據實覆陳。以備勘界時有所依據。並請皇上敕下。微臣催問英國外部。以勘界定期與分界辦法。一面即可相機辯論。仍與總理衙門函電相聞。務衷至當。臣非不知英人性情堅韌。當其驟得全緬。喜出望外。故許中國稍分其利。今則事隔數年。未嘗不思毀棄前說。然臣閱卷中節略。係英文參贊官馬格理與英外部侍郎克蕭會議時為最多。今幸二人均未更換。彼或雖遽翻異。臣不過多費筆舌。多糜日力。以與之磋磨。雖無速效。斷不致別有損礙。抑或冀得寸得尺。稍補涓埃。臣因邊疆得失。動關緊要。且此事為中外全局所繫。不敢不罄其愚忱。謹摹繪滇緬交界及南掌揮人疆域全圖。恭呈御覽。所有滇緬分界事宜。亟應豫籌緣由。理合恭摺密陳。伏乞皇上聖鑒訓示。謹奏。

擬催駐緬英員照約呈進方物片

光緒十七年正月二十五日

再臣查中英所定緬約第一條內緬甸每屆十年向有派員呈進方物成例英國允由緬甸最大之大臣每屆十年派員循例舉行所派之人應選緬甸國人等語當時中外注意專在申明成例惟未計及緬甸應於何年入貢所以但有此約而英之駐緬大員尙未舉行但恐久不催問此約卽成虛設臣因略查成案知緬甸向係十年一貢自道光二十三年入貢後因道路梗塞未經入貢光緒元年始復入貢一次是截至光緒十一年正應緬甸入貢之期我若不按時理論彼亦斷不過問數年以來因勘界事未定所以暫緩然此本各爲一事未便受其牽掣臣擬再略加查訪卽行文外部請其知照駐緬大員補進光緒十一年應呈方物俟光緒二十一年再按定例辦理萬一彼謂必俟駐緬十年始呈方物則經此一番考覈彼於光緒二十一年之期斷難宕緩矣蓋在我朝廷原不重此區區之貢然名之所在關繫較鉅理合附片具陳伏乞

聖鑒訓示謹

奏

滇緬分界大概情形疏

光緒十九年七月二十七日

奏爲遵

旨與英國外部商辦滇緬界線滇境西南兩面均有展拓謹陳大概情形恭摺
仰祈

聖鑒事竊臣承准總理各國事務衙門文開光緒十八年六月十六日密籌滇
緬界務一摺請

旨專派臣商辦滇緬界線商務以重事權奉

硃批依議欽此仰見

聖主睿於取遠鄭重邊疆至意曷勝欽服臣查光緒十一年英兵進據緬甸之
初前使臣曾紀澤先與英外部會商立君存祀既不可得英人自以驟闢緬甸
全境喜出望外是以有允曾紀澤三端之說界務一端則願稍讓中國展拓邊
界蓋指普洱邊外之南掌擇人諸土司聽中國收爲屬地也商務二端則以大
金沙江爲公用之江在八募近處勘明一地允中國立埠設關八募卽中國之
所謂新街也當時曾紀澤以未深悉滇地情形持論稍覺游移又因中外往返
商查之際未能毅然斷而行之僅與外部互書節略存卷旋即交卸回華次年

英署使歐格訥與總理衙門議立緬約五條。又以三端尙非定局。遂未列入約中。臣自去年奉

命與英外部議界。蓋在歐使立約之後。已六七年。查閱使署接管卷內有旨紀澤議存節略。英文參贊馬格理又係原議之人。臣屢遣馬格理赴外部重申前說。外部堅不承認。據稱西洋公法。議在立約之後。不可不遵。議在立約以前。不能共守。以其有約爲憑。既不敘入約章。必有所以然也。臣思英人自翻前議。雖以公法爲解。實亦時勢使然。當其併緬之始。深慮緬民不服。及緬屬諸土司起與相抗。萬一中國隱爲掣肘。彼則勞費無窮。因不敢不稍分餘利。以示聯絡。彼之所以驟允三端者。時爲之也。既而英人積年經理。萃其兵力。餉力。勘定土寇。復於緬境外之野人山地。稍用兵威脅服。收其全土。磐石之形已成。藩籬之備亦固。彼之所以忽靳三端者。亦時爲之也。前議三端。既不可恃。則展拓邊界之舉。毫無把握。且查滇邊諸土司。雖或久隸中國。然自乾隆以後。往往有私貢緬甸。以圖免擾。而固圉者。英人執此爲辭。來索緬甸固有之權。則或指爲兩屬。或分我邊地。殆事勢之所必至。若中國既失藩屬於前。又蹙邊境於後。非特爲鄰

其原竊笑亦恐啟遠人之觀。臣再四思維，深懼措注不善，致乖總理衙門其許之意，有辜。

皇上倚畀之恩，適值前歲秋冬以移，英兵游弋滇邊，常有數百人，以查界為名，闖入界內，去來森忽，野番土目驚饗異常，英兵常駐之地，則有神護關外之昔董暨鐵壁關外之漢董，英人用印度武員之謀，窺逼近界，以至沿邊騷動，風警頻仍，雲貴督臣王文韶慮生釁端，迭經電達總理衙門，臣承總理衙門急電，辦文照會外部，斥其違理，責令退兵，又屢赴外部苦口爭論，英兵稍自撤退，滇邊至今靜謐，臣又查野人山地，縣互數千里，不在緬甸轄境之內，若照萬國公法，應由中英兩國均分其地，曾紀澤嘗有此意，而未申其說，臣因復照會外部，請以金沙江為界，江東之境均歸滇屬，明知英人多費兵餉，占此形勝，萬萬不肯輕棄，然必借此一著，方可力爭上游，振起全局，外部果堅拒不應，兩次停商，而臣不顧，數次翻議，而臣不顧，外部所稍依允者，印度部復出而撓之，印度部所稍鬆勁者，印度總督復出而梗之，印督至進兵蓋達邊外之昔馬，攻擊野人，以示不願分地之意，臣相機理論，剛柔互用，外部謂此議非出自總理衙門與

雲貴總督盡係使臣之私意。臣電請總理衙門向英使歐格訥辯論以昭一律。總理衙門洞晰機宜力伸畫江爲界之議。外部知我中外同心合謀堅持不讓。甫稍就我範圍。然猶疊次翻騰。屢易其說。彼既重視野人山地。不願分割。於是。有就滇境東南讓。我稍展邊界之說。據稱已與印督商定。於孟定。橄欖壩。西南邊外。讓我一地。曰科干。在南丁河與潞江中間。蓋卽孟良土司舊壤。計七百五十英方里。又自猛卯土司邊外。包括漢龍關在內。作一直線。東抵潞江。麻栗壩之對岸止。悉劃歸中國。約計八百英方里。又有車里孟連土司轄境甚廣。向隸雲南版圖。近有新設鎮邊一廳。係從孟連屬境分出。英人以兩土司昔嘗入貢於緬。并此一廳爭爲兩屬。今亦願以全權讓。我訂定約章。永不過問。至滇西老界與野人山地。昆連之處。亦允我酌量展出。其駐兵之昔董大寨。雖未肯讓歸中國。願以穆雷江北現駐英兵之昔馬歸我。南起坪隴峰。北抵薩伯坪峰。西逾南嶂。而至新陌。計三百英方里。又自穆雷江以南。旣陽江以東。有一地約計七八十英方里。是彼於野人山地亦稍讓矣。其餘均依滇省原圖界線劃分。外部於三月二十三日行文照會前來。臣適探知歐格訥與印督尙多方播煽。欲阻

docsriver 文川网
入驻商家 古籍书城

在文川网搜索古籍书城 获取更多电子书

成議事機呼吸變態萬端。此議雖未滿臣初志，不能不審勢而量力，見風而收帆。曾經將此情形電請總理衙門進呈。

御覽總理衙門與雲貴督臣之意，亦謂於舊界有益無損，屬卽商擬條款。臣先行文外部，訂定大局，惟騰越八關界址未清，尙須理論。外部請待印度所寄地圖，又值外部諸員避暑在外，稍有停頓。前據督臣王文韶電稱，漢龍關目前明已淪於緬，天馬關亦久爲野人所占跨，則八關僅存六關。現經臣再三爭論，此二關亦可歸中國。又前年英兵所駐之漢董，本在界線之外，臣因其扼我形勢，逼處堪虞，向彼力索，外部亦願退讓，以表格外睦誼。刻下界務已竣，商務本不似界務之繁重，且已先將大意義明，無甚爭論。現正商訂條款，計可刻期蒞事矣。臣竊維數十年來，西洋諸國競知中國幅員遼闊，又有不爭遠土之名，一遇界務，鮮不爲眈眈之視。若可聽其蠶食者，於是琉球、越南、緬甸，以藩屬而見吞；香港、暹羅、海參崴，以邊隅而被攘。甚至有睨及朝鮮，議及臺灣者。中國素守好大喜功之戒，避開疆生事之嫌，得之則曰猶獲石田，失之則曰不勤遠略。顧石田棄而映壤危矣，遠略弛而近憂迫矣。我視爲荒土而讓之，彼一經營，則荒土

化爲奧區。以奪我利柄。我見爲甌脫而忽之。彼一布置。則甌脫變爲重鎮。以逼我巖疆。伺閒蹈瑕。永無底止。歲朞月削。後患何窮。臣愚以爲必擇一二事。以全力爭持。然後可以折狡謀而挽積習。此次滇緬界務。憑藉

皇上寵靈。始變前規。稍展舊界。實維總理衙門之功。總理衙門統籌全局。假臣事權。始終扶助。謀議相同。每有查詢。朝電夕報。俾臣得遠承指揮。稍殫愚拙。雖獲地無多。而裨益有五。風示各國。俾勿藐視。一也。隱備印度。杜其窺伺。二也。保護土司。免受誘脅。三也。扞衛滇邊。防彼劫進。四也。援用公法。稍獲明效。五也。有此五益。臣始知曾紀澤所商展之界。迄今時異勢殊。亦稍有窒礙之處。蓋南掌諸部。近已盡歸暹羅。爭之已覺不易。而擇人各種。惟康東土司最大。其地與車里相彷彿。英人欲據以遮隔法暹兩國。斷不肯舍。抑且離我邊境較遠。控制不易。固不若今日之所展。皆在近邊也。除俟條約擬議妥協。再電達總理衙門。並專疏詳報外。謹繪滇緬分界圖一幅。恭呈

聖覽。以黃紅藍三線分別舊界新界。與英所欲占而退出之界。所有商辦滇緬界線。西南兩面均有展拓緣由。理合恭摺馳陳。大概情形。伏乞

奏

駐緬英員遵約呈進方物片 光緒十九年七月二十七日

再查緬約第一條內英國允由緬甸最大之大臣每屆十年派員呈進方物所
派之人應選緬甸國人等語當英兵據緬之初使臣曾紀澤迭准總理衙門密
電以立君存祀商之英國外部英廷不允存祀始改爲存貢之議迨英署使歐
格納與總理衙門訂立緬約盡力磋磨意存翻悔經總理衙門堅持不懈始將
十年派員之例列入約中誠以告朔餼羊雖不過稍存禮意而百年舊典未可
弁髦棄之也惟聞英廷謀議始得緬甸頗出意外慮中國之隱掣其肘爰不憚
以此虛禮款我八九年來英人緩輯全緬布置既密益務恢張其駐緬大員尙
無照約舉行之意印度諸員異議亦由此而起德法諸國之好議者亦且從而
譏之謂英以堂堂大邦修貢中國未免徇寶利而不卹虛名英之外部頗存顧
慮隱悔前事臣於前年卽派員赴印度部探問入貢之期該部人員一味支吾
頗多遁辭臣恐久不催問此約竟成虛設因與外部再三理論外部始則設辭

推宕。繼稱待至光緒二十三年照約舉行。最後答文稱英廷已豫備光緒二十年第一次派員赴中國。蓋其用意甚深。實爲滇緬分界。不能稍讓地也。臣於分界各端。既斷斷與爭。不稍鬆勁。深恐彼於貢事難免變計。所以外部答允雖久。未敢信爲定論。今界務已大致就緒。彼於貢務亦無異言。明年定可照約派員。初次規模既定。則以後源源納貢。不至誤期矣。理合附片具陳。伏乞

聖鑒。謹奏。

派營彈壓野人山地片

光緒十九年七月二十七日

再臣與英外部爭劃野人山地之時。英人動以野人兇悍。中國兵力不能管理爲辭。且謂中國徒爭此地而不知管理。必致野人愈橫。擾累英人。所以有萬難分劃之勢。臣查野人頗知耕牧。亦通市易。其馴順之氣。實過於臺灣之熟番。前歲遊歷道員姚文棟道經此地。野人結隊送迎。環求歸屬中國者。到處皆是。此等野人雖不隸郡縣。數百年來。中國以不治治之。聽其自生自育。未嘗不涵濡聖化於深山之中。一旦聞西人逼處。知將奪其利源。其嗚嗚內嚮之誠。至爲迫

切蓋英人進兵野人山地及滇省近邊。不過在此三年之內。去年臣接滇商公稟。頗歸怨於騰越鎮廳之退讓。騰越鎮廳平日未諳洋務。又時時懼以啟釁。獲戾倉猝爲敵所乘。措注失當。不免應之過柔。亦事理所必有。臣之與英分界。適在英人占地之後。所以爭之更覺其難。然臣不敢不俯順輿情。扼要力爭。爭之不得。亦俾遠氓知我。

聖朝並非棄之化外。實係時勢使然。至被族與我爭地。動稱控制不易。莫相恫喝。彼乃得步進步。乘機侵占。臣是以明告英人。如野人山地歸中國。則撫綏彈壓。中國任之。自係責無旁貸。今中國所分昔馬之地。係一種開欽野人所居。又老界之內。亦有野人隨地散處。儻仍如承平之世。不加管理。萬一野人出境滋擾英人。英必以我不能守約來相詰責。尤恐枝節叢生。相應請

旨敕下雲貴督臣。俟換約之後。查照約章。派撥得力練勇一二百人。進駐昔馬。替換英兵以鞏邊防。兼可約束野人。俾就範圍。抑臣又觀西洋形勢。凡兩國接界之處。莫不明斥候。修礮臺。造兵房。雖累世和好。而設備謹嚴。遂能彼此相安無事。雲南西南兩面。昔與揮人野人各種相接。所以臺壘久圯。關堡不修。亦可

無虞侵逼。今與西洋最强之國爲鄰。則如何整頓一新。如何規畫盡善。想督撫臣皆久練疆圉。公忠在抱。必有先事綢繆者矣。至各省綠營舊制。往往爲外人所輕視。以其用舊器而乏實用也。則又非酌練新軍。不足以隱銷外侮。臣之愚見如是。理合附片密陳。伏乞

聖鑒。謹

奏

收回車里孟連兩土司全權片

光緒十九年七月二十七日

再滇屬東南羈縻之境。以車里孟連兩土司爲最大。近年新設鎮邊直隸廳。撫理孟連北境。計此一廳兩土司之地。約可抵內省四五府。當臣與英廷爭論野人山地之時。英外部以車里孟連曾經入貢緬甸。亦堅索兩土司及新設一廳。作爲兩屬。以相抵制。臣查會典及一統輿圖。車里孟連隸滇已久。鎮邊新設直隸廳。同知一官。若忽改爲兩屬。尤屬無此體制。不得不儘力堅持。厥後外部遽自轉圜。願以全權仍歸中國。果使撫取得宜。固守封域。可以支格英法暹羅三國之窺伺。而臨安善洱思茅元江諸府。廳州當皆恃以無虞。不意英事甫定。法

謀又起。邇來法人迫脅暹羅。割其湄江東岸之地。而車里轄境之大半。亦在湄江以東。法人迭次以分界爲請。雖據聲稱並無侵占滇地之意。彼知英人饒舌於先。未必不思效尤於後。然英究僅有索問之空言。並未獲絲毫之實利。臣今正與英廷互商條約。聲明車里全屬中國。與英毫無干涉。約章一定。不啻借英助我作證。法人素性畏強侮弱。彼聞中國與俄爭帕米爾。與英爭野人山。皆不遺餘力。儻竟知難而退。僅請分劃界限。以杜爭端。則和平互商。自易辦理。不啻口舌不起風波。尤善之善者也。理合附片具陳。伏乞

聖鑒。謹奏。

強鄰環伺。謹陳愚計疏。光緒十九年七月二十七日

奏爲強鄰環伺。世變方殷。謹陳愚計。略備

采擇。恭摺仰祈

聖鑒事。竊臣博攷輿圖。遐稽史籍。知我

國家幅員之廣。軼漢邁唐。而超越於宋明數倍。惟元代極盛之時。差足比隆。然

元之塞外諸部不時自爲分裂未若我

聖朝之一統無外控制得宜蓋形勢之雄治平之久人民之眾洵莫與京矣自泰西諸國航海東來始不過藉互市之名逐什一之利相狎既久寔有違言疊端之起僅在五十餘年以前謀臣議論不一忽和忽戰累次失利紛紜者逾二十年而元氣已大損矣厥後更定約章稍持和局外警之迭起環生者幾於無歲無之中外籌議不能不以防海爲兢兢地之險者扼之土之荒者闢之軍之闕者設之才之乏者練之械之精者購之藝之良者習之蓋既經盡臣碩輔內外合謀苦心經營者亦逾二十年中國聲威稍稍異於曠昔然瀕海之區迴環萬數千里布置旣已難周猶且艱於物力缺於人材限於時勢格於議論措施不過十之二三而狡寇窺逼之大勢又不僅在海而在陸矣臣竊按英俄法三國歐羅巴著名強國也其國都皆距中國三四萬里彼知西洋大小諸邦競能自立難逞雄圖未肆西封遂勤東略英人初藉公司之力蠶食五印度未幾而沃壤數萬里盡爲所併遂與我之西藏爲比鄰近且脅服阿富汗克什彌爾巴達克山什克南諸部爲英屬國其大勢駸駸北嚮旣越蔥嶺而與我之回疆相

接南併緬甸而雲南之邇南邇西悉與昆連矣。俄國自興安嶺以外東傳於海。包我黑龍江全境。暨外盟蒙古烏梁海諸部西軼新疆諸城。地勢尤爲廣遠。自咸豐年間來索舊地而黑龍江以南烏蘇里河以東勘界一誤。蹙地數千里。至今西人動輒藉口。謂爲中國不重邊地之明證。侵奪之謀無時或息。俄人又於同治年間乘我內寇不靖。稍以兵力吞滅浩罕布魯特哈薩克布哈爾諸回部。自是俄境亦接回疆。其地匝我三陲。迴環殆不下二萬餘里。法人自爭得越南。旋脅取真臘一國。歸其保護。近又侵割暹羅湄江東岸之地。疆圉愈廣。氣勢自雄。而兩廣雲南邊外益以多事。由斯以觀中國東南兩面大海繞之。其自東北以訖西南。則三強國之境繞之。防於海者動虞諸國窺伺。防於邊者日與三國周旋。至於南洋諸島。星羅棋布。昔人所謂海外雜國。東南際天地以萬數。時候風潮朝貢者。今已爲英與荷蘭西班牙三國之外府。竟無一島能自存者。此殆宇宙之奇變。古今之創局也。然猶有可冀者。曰彼雖盛於一時。終將衰於異日。願臣觀西洋大國圖治之原。頗有條理。英俄法皆創國數百年。或近千年。炎炎之勢。不始今日。今其制勝之術。屢變益精。舟車則變而火輪矣。音信則變而電

傳矣。槍礮則變而後膛矣。戰艦則變而鐵甲矣。水雷則變而魚雷矣。火藥則變而無煙矣。窺敵則變而用氣球矣。照夜則變而用電燈矣。專家之學。互殫智力。往往能制馭水火。呼吸風霆。新藝迭出。殆無窮期。其恃強逞威之具。既如此。然猶有可慰者曰。彼既與我和好。未必遽蓄狡謀。顧國必自強而後和可恃。夫制敵而不制於敵者。莫如鐵路。英之鐵路。一已抵西藏近邊之大吉嶺。一已達雲南近邊之新街。俄之鐵路。將由塔什干而趨浩罕。近復經營西伯利亞鐵路。東聯暉春海參崴。法開鐵路以通商貨。已由河內直接諒山。而我無一足以應之。俄人移我界牌。脅我屬部之事。時有所聞。邇來帕米爾一役。終不脫占地故智。英人力爭野人山地。印度各官志在分據險要。侵逼滇疆。臣因滇緬分界。知其隱衷。法人注意滇南諸土司。已見端倪。彼既撤我藩籬。稍久必窺堂奧。其貪得無厭之情。又如此。蓋事變如此之棘。時局如此之艱。皆肇端於此數十年內。夫自開關以來。神聖之所締造。文物之所彌綸。莫如中國。一旦歐州強國四面環逼。此巢燧羲軒之所不及料。堯舜周孔之所不及防者也。今欲以柔道應之。則啟侮而意有難贖。以剛道應之。則召釁而力有難支。以舊法應之。則違時而勢

有所窮以新法應之。則異地而俗有所隔。交涉之事。日繁一日。應付之機。日難一日。誠不知何所底止矣。惟是通變方能持久。因時所以制宜。伊古盛時。或多難以保邦。或殷憂而啟聖。臣愚以爲

皇上值互古未有之奇局。亦宜恢互古未有之宏謨。夫英國地多而勢散。俄國土曠而人稀。法國政煩而民困。彼有所長。亦有所短。我有所短。亦有所長。誠能去所短而集所長。自可用所長而乘所短。未得其術。則難者益難。苟握其要。則難者亦易。臣謹擇其約而易行者。請爲

聖主陳其大略。一曰勸人才。所謂才者何常。時方無事。則以黼黻隆平爲貴。時方多事。則以宏濟艱難爲先。夫道德之蘊。忠孝之懷。詩書之味。此其體也。而論致用於今日。則必求洞達時勢之英才。研精器數之通才。練習水陸之將才。聯絡中外之譯才。體用兼該上也。體少用多。次也。當風氣初開之際。必有妙術以鼓舞之。則人自濯磨矣。迨豪彥競進之時。必擇異能而倚任之。則事無叢勝矣。羣才之振奮。默運於

九重之精神。勸之有具。斯培之有本。培之有本。斯用之不窮。至於多設學堂。隨

地教人多選學生出洋肄業。亦皆儲才之要端也。一曰整武備。歐洲諸邦以戰立國者一二千年。凡事皆有專門名家。故中國練軍不能不參仿西法。海軍取法於英。陸軍取法於德。已稍著成效矣。顧北洋而外。推行未廣。尙不足以建威銷萌。且論今日海軍不在擴拓規模。而在簡覈名實。不在遽添船礮。而在增練材藝。俟其成效足與西軍相頡頏。再援昔日化一爲三之議。擴充分布。則海疆自可無虞。至各省綠營。疲窳特甚。前督撫臣曾國藩胡林翼已早言之。似宜先就臨邊之地。與英俄法相近者。稍稍變綠營爲練軍。因其舊餉。給以新式火器。而以西法部勒之。漸除廢弛拘攣之習。免爲西人所笑侮。又查有可屯墾之地。不妨酌置練軍。或仿漠河金礦之例。許公司集股開礦。練營自護。隨時操練。以備調用。似亦兩得之道也。一曰濬利源。泰西諸國競籌藏富於民之法。然後自治自強。措之裕如。卽臣所謂養才練兵。亦非帑項充盈不可。蓋生財大端。在振興商務。商務以暢銷土貨爲要訣。欲運土貨。以創築鐵路爲始基。今者國家旣籌的款。營造山海關鐵路。以期漸達於東三省。此固護邊至計也。然地勢稍偏。土貨不旺。尙需歲貼養路巨費。恐非持久之局。今欲使此路廣引商貨。

docsriver 文川网
入驻商家 古籍书城

在文川网搜索古籍书城 获取更多电子书

化貧爲富似非通內地鐵路不爲功內地鐵路仍宜查照湖廣督臣張之洞原議分年籌費由漢口開路以抵蘆溝橋而達山海關則秦隴楚蜀晉豫之土貨日出日多轉輸益遠商利自饒必有自集公司依幹路以築枝路者不必官爲籌款寢假六通四闢富庶之機蒸蒸日上不僅有事時徵兵運餉爲便矣臣又嘗閱光緒初年各關貿易總冊洋貨入口與土貨出口厥價略足相抵近年洋貨驟贏土貨驟絀中國歲耗銀至三四千萬兩則以洋布洋紗暢銷故也蓋其爲物出自機器潔白勻細工省價廉華民皆樂購用而中國之織婦機女束手坐困者奚啻千百萬人今上海武昌皆已購機設廠織布紡紗天津亦有紡紗之議誠宜推之各省及各郡縣官爲設法提倡廣招殷商設立公司優免稅釐俾資鼓勵收回利權莫切於此其他養蠶繅絲之法植茶焙葉之方鍊鐵開煤之學一一講求整頓豈非利用厚生之政探本握要之圖乎一日重使職昔漢武帝詔舉茂才異等可爲將相及使絕國者西洋諸國或以宰相及外部大臣出爲全權公使或以資深望重之總督出爲全權公使其視使職與將相並重大抵相臣襄內政使臣襄外務外與內相表裏也將臣尙武力使臣尙文辭辯

與力相補救也。有百年安邊之計。定於三寸舌者。富弼之使契丹是也。有一介行李之馳。賢於十萬兵者。陸賈之使南粵是也。方今英俄德法美數大國。各挾勝勢以相陵相伺。其事體又與古迥異。彼與我立約通商定界。動輒有大利大害。倚伏乎其中。臣嘗謂國勢之振興。不盡恃戰勝攻取。但能於交涉數大端。措注合乎機宜。恢張自有明效。夫總理衙門所恃爲耳目爲手足爲心膂者。莫如使臣。中國古多卓犖之士。然今尙稍艱其選者。不講之於豫也。西洋久著疆盛之績。然今尙不竭於用者。能練之以漸也。伏願樹之準繩。明示激勸。則風聲一播。足以奔走天下。俾人人以經濟爲先。資以遠謨爲急務。上之所重。下亦重之。下之所重。效自隨之。亦在。

聖意之專注而已。以上四端。類皆勞臣之所經畫。

聖主之所施行。臣不過稍請變而通之。擴而大之。用力旣專。收效自倍。庶冀紓外患而固邦本。大抵英人堅韌。俄人偏疆。法人蠻橫。而探其狡黠之謀。則各造乎其極。殊令我有應接不暇之苦。然論我國有之權力。苟善用之。未嘗不爲彼所深憚。誠使經理日宏。賢能日奮。必善審三國之變而備之。可也。卽徐待三國。